

四庫全書

集部

欽定四庫全書

集部

鄧峰真隱漫錄卷二

詳校官庶吉士臣李如筠

主事臣呂雲棟覆勘

總校官降調編修臣倉聖脉

校對官中書臣孫溶

謄錄監生臣戴朝梁

欽定四庫全書

集部四

鄭峯真隱漫錄

別集類三

宋

提要

臣等謹按鄭峯真隱漫錄五十卷宋史浩撰
浩有尚書講義已著錄其集見於陳振孫書
錄解題宋史藝文志者皆五十卷此本卷數
並合浩事孝宗于潛邸隆興淳熙中兩為宰
揆沒後至配享廟廷其推轂善類寬厚不爭

亦頗為世所稱許當孝宗任張浚銳意用兵
浩獨以為不然遂以論劾罷去元代史臣作
浩傳贊亦頗詆其不能贊襄恢復之謀今考
集中如論山東未可用兵論歸正人論未可
北伐回奏條具弊事諸劄子皆極言李顯忠
邵宏淵之輕銳寡謀不宜輕舉而欲練士卒
積資糧以蓄力於十年之後既而淮西奔潰
其言竟驗若著龜不可謂非老成謀國之見

雖厥後再秉國政亦未能收富强之效以自
踐其言而量力知難其初說固有未可深議
者至本傳稱浩因轉對請於普安恩平二王
內擇立一人為皇子高宗亟稱為有用之才
而集中輪對有司不能推廣恩意劄子下注
云見知高宗只因此劄此事乃當在請定繼
嗣之先而本傳顧未之及集為門弟子編排
所言當必有據是亦足與史相參考也集凡

詩五卷雜文三十九卷詞曲四卷末二卷為
童仆須知分三十章所言皆治家修身之道
而諧以韻語乃錄之家塾以訓子孫者自署
辛丑為淳熙八年蓋其罷官以少傅侍經筵
時所著云乾隆四十六年三月恭校上

總纂官

臣紀昀
臣陸錫熊
臣孫士毅

總校官

臣陸費墀

欽定四庫全書

鄧峰真隱漫錄卷一

宋史浩撰

古詩

東湖遊山

庚申居下水

四明山水天下異東湖景物尤佳致古來奇處蕪沒多
極目空餘老蒼翠最稱險奧唯福泉萃嶺萬仞摩青天
屹起精藍名壽聖松風颭颭泉洄洄一徑崎嶇通下水

風物人情更淳美兩椽茅屋何蕭然是即吾廬靠山起
吾嘗終日倚闌干眼界峨峨碧玉攢有時出戶一乘興
枯筇蠟屐隨清湍攀蘿直上上水去烟霞迤邐僧家路
龍藏虎蟄天地寬陟岵歔歔空墮淚次經象坎白雲庵
陰崖斷谷常青嵐中有村墟號韓嶺漁歌樵斧聲相參
陶公霞嶼崢嶸出秀傑繇延數非一鼈山孤立水中央
規圓不賴人鐫刻地雄山壯泉源豪七十二溪俱怒濤
截山突岼起六堰百尺花蹊金石牢鳴榔擲釣漁艇

短數百成羣來往歎綠蓑青笠苦忘歸細雨斜風渾不
管棲真蘭若唯南隅聞是徐王舊隱居蓮塘十里香風
濶鳬鷺鸕鶿時沉洳一帆迅抵青山寺丈室雲堂高巖
肩森森松菊蔽村祠細讀刊碑知故事云是皇朝李使
君濬濁澄清利後人迄今早歲賴實利血食往往長秋
春破霧穿雲梯磴滑石脅山腰偏金剝濯足清流舒嘯
長簣簞十畝清風夏紫衣道士氏曰朱高論山前結草
廬客至石壇無俗物橫琴數曲酒一壺對岸二靈只一

葦依約誰家葬龍耳夜深疎雨洗遙空一朶濃雲罩山
觚金欄禪老今大顛壞衲蒲團日坐禪我行不問西來
意消息還將方寸傳烏石山頭膝與口泓澄萬丈輝星
斗過客誰知此地靈只聞靜夜生龍吼鑑湖蕪沒多田
疇臨平車馬尤喧啾紛紛未識茲萬頃神仙窟宅合在
東南北西陬周游幾千里此興猶未已歸來摸寫筆不
停大匠從其誚狂斐

時晉亨作小軒塊石盆池名曰趣遠真隱居士

賦之

新晴可步履杖策穿雲林蕭齋有達士六合涵胸襟東
偏闢小窻廣袤不盈尋片石遠山意寸池滄海心乃知
一芥子可納須彌岑歸鴻目不盡為爾發微吟

次韻鮑以道天童育王道中吳體

逆雲佛塔金千尋傍聳滴翠玲瓏岑春供萬象富遠目
嚮答兩地紛啼禽風搖野幘去復去露浥乳竇深尤深
奇聲俊逸鮑夫子蓮社不掛淵明心

次韻楊少輔山居六詠

疊山

嵩山遠萬里兒孫可邀致當軒羅三峰便有出羣意不
蠟謝氏屐徜徉日遊戲邂逅風雨興端可名福地

鑿池

蕭蕭足佳致心遠地自偏斫去蒼苔紋得此清冷泉湛
然不容滓於以明性天肯復以童兒見諂韓公篇

栽松

童童蒿艾間拱把力尚微托根一得所勢隘天四圍春
煙滋蒼髯朔雪被羽衣他年大夫封風雨良足依

洗竹

春林藉雷驚觺觺牛羊出風月邇來稀厭此琅玕密繁
柯謝一洗挺挺歲寒質終成葛陂龍雲路騁駿逸

澆竹

芳圃向成趣雨澤多愆時花開不抱甕花謝嗟何為潘
岳興不淺陶潛顏可怡安得商家霖萬木均嬉嬉

雉草

設羅門巷靜草深山更幽何事勤誅鋤杖屨來羊求王
孫未歸楚萋弘已棄周惜此年年綠君其勿剪休

雪中三英

梅花

雪花大如毬萬木方枯愁絳衣孕珠顆的皪枝南頭風
標信孤挺游戲墮入境褪白露微青志已在金鼎

蠟梅

蜂房釀餘滋衆香薰蜜脾幻作應真面行行排玉枝相看紫檀色風搖振金錫天遣久住世不畏高樓笛

瑞香

蕙帳萬緣空幽入鼻觀通破曉捫翠麓獲此錦薰籠造化本無意芬芬隨爾類不知鼻聞香還是香浮鼻

次韻慈興寂照院僧石岩花

谿山朔雪銷籬落始聞花信驚梅萼韶華一瞬掉頭去滿眼園林成翠幄誰知幽谷猶藏春萬蒂千跼意態

新霞光分彩氣欲熱露浥燕脂色未勻墨工繪句謾稱
好不見此花空到老子美羞看黃四蹊退之不數紅雲
島天下健步吾能用擬擘雲頭騎綵鳳叫閭乞與生香
歸只許牡丹名並飛

雪夜行舟罵鬼

朔風一夜吹寒雪萬里青山變華髮東湖興盡回扁舟
兩岸蘆花照天發篙工撥棹光陸離一蓑好景渡頭歸
忽驚波面漸幽晦問訊歸程船復退空岩有鬼鳴啾啾

鼓櫂揚波如部隊須臾夜朗分西東對岸村墟指顧中
妖氛孽影叱咤散人家燈火猶朦朧嗚呼山鬼爾何錯
滅頂於余奚所作不能隨爾作禍釁冷炙殘盂圖咀嚼
我有長牋叩上真我有健步飛如神請呼雷公起霹靂
割截汝輩為微塵嗚呼山鬼聽我語從此逍遙自游止
如斯攬括枉費力生死由天不由汝

宣州李漕園亭三首

控鰲亭

平生謝宣城作意澄江練不知煙霞間有此巨鼇扑三
山沒決滂幾歲舞鱗鯨邂逅釣竿手一掣金背見控之
朝玉京飛騰絕星漢控之游絳闕蓬萊壓諸彥偉我亭
中人風雷有奇變何必紫綺裘日誦黃庭卷

吸川亭

百川鰲鯨波鯨背高突兀佳氣浮金銀層觀可髣髴中
有萬頃陂餘地納溟渤咫尺三千里驚湍礮凡骨而我
理煙艇遙欲窺其窟凭欄俯瀾漫始覺到蒼翠涓流信

污沱晝夜徒汨汨萬錢沃燥吻何取盃中物

守道堂

但徠不可倚衡茅跡已陳凜凜蓋代氣千載日日新
拭眼登高堂佳名信可人向來石子無乃公前身作頌
擬清廟未免世俗嗔偃蹇百僚底見有雙眉顰公今文
章伯筆力重萬鈞廟堂有變處此道公當伸

史伯魚讀書堂

我來嗟許晚已失讀書堂遺址煙焰餘草木猶輝光乃

知子史子揭名意何長書冊本可好履踐斯為良癡絕
蠹萬卷未若陶食忘苟得是中趣高可雲外翔政不守
螢雪汨汨勤朱黃譬如沈痾痊安用千金方

代叔父九經堂歌

黃冠物外士碧眼世中兒琅函赤軸富裒蓄金作蛟龍
盤繡柄撞鐘擊鉢走聾俗聖典寂寞令人悲我登九經
堂四顧光陸離畫簷散彩噴朝日翠幌倒影搖天池牙
籤插架爭突兀若有鬼物森扶持使君雅意尊經術故

闢後圃披遺基咄嗟土木上星漢下視仙宮梵宇俱么
微我願茲堂徧寰海共治皆以經為師一變人心至齊
魯再使風俗躋農羲却向茲堂命賓友霜藤象管唱新
詩東風吹到君王耳喚取文翁歸玉墀

次韻沈澤夫逍遙歌

在昔蒙莊有至言萬物逍遙天地間大鵬斥鷃異稟賦
隨性奚假人防閑怒飛未覺宇宙隘決起那知世界寬
洪纖有量莫相越智巧不用常優閒默觀萬化盡如許

脫悟此理行非艱但當涵養取深造工夫祇在澄心源
心源澄寂固能應視彼所寓皆居安佳哉蒙莊豈誕妄
所得實自吾孔顏達則兼善非附勢窮而獨處非左計
陋巷簞瓢依聖師何殊禹稷游平世脩仙欲生成大幻
佞佛欲死是乾慧死生之說本同歸原始當求一言契
了知吾道出世間學渚深流不思濟遂令前輩薄後人
直謂軻死真無繼此生造化曷可輕勿為名利思營營
吹噓呼吸勤吐納導引致壽先熊經後枯正藉一溉力

且使既老身康寧向上更須觀一著一之所起猶未形
從渠海岱自更貌何止一閱三千齡守一還期守真一
真一誠通能事畢吾之所取進乎技解牛中得養生術

次韻沈高卿雜言

讀書正其遠大者莫為螭蜥專爾雅儻從紙上覓筌蹄
當識升高必自下富貴不來將奈何豈作求食思毀瓦
富貴適來無容心處以恬然寧滿假仕宦要須得若人
是為學足美其身萬方思治僣康濟當吏立政頻諮詢

從容風俗到淳古坐可堯舜吾君民昂頭引頸不愧慚
奚必翰墨誇清新吁嗟二者理非各俗儒妄分誠臆度
學成用我鶚在天不用聊復龜藏穀名利寵辱尚如許
死生之變良足託沈子才雄敵萬夫聲華合與前賢符君看
昔人可炙手行若市井真屠沽敝袍陋巷世不如往往
胸次多良圖廼知富貴本餘事窮達有命吾生俱君詩
卓絕了無和我復感激重揚揄難逢臭味同勉子謹厥
初毋待桑榆補東隅

代上孫仲益尚書生日

吳山高兮江水長江山鬱鬱蟠光芒上帝靳固鍾俊良
數千百歲誰可當西徐老人鬢蒼蒼身著秋碧雲錦裳
馭風騎氣下大荒帝命錦繡裹肺腸天門賜之龍虎章
下為人間除不祥主盟吾道承素王向來斯文病膏肓
公於此時氣堂堂道配歐蘇力相望朝游蓬壺暮扶桑
黼黻河漢回輝光臨流拯溺為舟航人生廢置不可量
萬里放逐虺虺鄉翦翎籠中看鵬翔小儒願公如子房

不願公貴如六郎玉烈石髓請飽嘗不須更待龍宮方

題陳天子國正借軒

子猷昔借宅餘地著霜筠君今地無隙乃復借諸鄰開
窻羅萬箇傾蓋如相親輕風韻蕭瑟密雪乘珠珍行當
享清絕寧問誰主賓人生空洞間千畝納渭濱胡為徇
目力咫尺分參辰便當混物我一視無越秦還以賞君
軒借與不借均此意識者會君無語俗人

贈天童英書記

學禪見性本學詩事之餘二者若異致其歸豈殊途方
其空洞間寂默一念無感物賦萬象儒懸鏡太虛不將
亦不迎其應常如如向非悟本性未免聲律拘英師箇
中人以詩隱浮圖桃紅柳青青翠竹黃花俱誤落世間
耳脫畧公卿徒昨朝得東風打包過江湖胡為來帝鄉
叫閭徹宸居堂堂老阿師道價東西徂住山垂一世學
子紛雲趨寒潭風靜練皎月天心孤邇來隻屢輕片雪
銷洪鑪願言立疆名故事臣敢誣事成明當發長吟入

春蠶從茲宰堵波山雪悶天書顧我坐學省兀兀如守
株因君聽蓬雨為謝故溪魚

次韻遊西湖

李知幾國錄

平生林處士一葉老波光坐令西湖名千古磨蒼蒼通
來子李子掉鞅出柴桑官閒到休日清淺尋幽香金風
度林麓野艇生微涼竹閣寄登覽孤岑水中央拂石辨
奇蹟哦詩味遺芳歸來筆不停醉墨翻淋浪他時三賢
亭合著君在旁只恐作霖雨幽夢通商王

次韻馮圓中酴醾

東風滿架吹寒玉，慣逐園丁供菜束。
瀛洲一見眼偏明，縹渺霓裳舞仙曲。
紛紛桃李俱蒼苔，冰壺著此真幽獨。
更須釀取甕頭春，醉倒莫看蠻與觸。

碧雲堆裏顏如玉，紅紫便應高閣束。
千尋結架上青冥，山外水邊隨詰曲。
飄然來及牡丹時，潔白自知吾步歎。
道人儻置枕屏前，第一莫教纖手觸。

次韻馬德駿贈劉韶美

時不就試

迢迢弱水環蓬山山在虛無縹渺間子有仙風彌八極
雲烟為爾一開闕却欲管城邀四友寫出嘉模看匠手
功名不掛達者心未比即時一杯酒夫君胸次非不活
就使口占須腕脫惟其不欲世人誇辯洽漢董唐劉顏
如甲

次韻王龜齡贈韶美

奎壁忽墮地晁董喧炎劉公生百世後掉鞅從之游仙
桂滿月窟何事玉斧修亭亭看直上高壓百花頭昔我

登麟閣正喜挹風流參辰曳裾日心旌倍悠悠紉蘭作
春佩采菊供晨羞相期有義路歲晚俱能由

和建王雨中聞戒酒之什

簇雲行太虛作霖自天意涼氣入郊垌通宵喜不寐
鼓喧銅駝鯨鐘韻蕭寺遲明上層樓羽扇端可棄萬象
奔空來攬之入詩思七椀有餘清一觴成徑醉倒着白
接羅飄蕭新出笥客有可人姿終規聊見志樂飲雖及
辰沈酣非所恣主人雲夢胸綽有容物智溫顏起謝客

博哉斯言利平生千金軀於此肯嘗試逡巡掃鉅篇華
袞酬一字觀者嗟賢王不以儒為戲

上建王生辰

上帝昌我宋高目視所以天子亶聰明亦既受多祉慶
澤渺夢圖班衣有元嗣茲辰甫誕辰想見龍顏喜

子孝與臣忠二者有大戒王今得兼隆無乃神所介晨
昏奉赤墀腰圍白玉帶堂堂真天人驕吝蔑纖芥

中使曉飛鞚下拜金屈卮門既卻賀賓宴不侈曲眉玉

鑪淨槩几但誦天保詩在我有古制在彼俱弗為
下客曳長裾薄技奚所奏唯有六經腴王心本研究方
瞳秋月明綠髮寒松茂天子歷無疆王亦千萬壽

遊西湖分韻得要字

儒生紙上爭攻剽傳癖書癡等貽誚不然利海競錐刀
或向名場羨華要紛紛臧穀兩亡羊說以西湖却頭掉
西湖自倚傾城姿肯與西施角年少品題定價有前賢
陳迹班班猶可弔試因休沐許尋盟淨洗緇塵一登眺

身疑孤星破浮雲心逐驚猿走空嶠野竹萬箇秋聲虛
敗荷十里香風妙凌霄金刹梵仙居怪石嶙峋餘萬竅
高敷桂子浥新黃好傍長枝發清嘯老禪林外熟蹲鴟
雙耳不聞天使召行行欲問處士橋路轉忽逢水仙廟
未羞菊蕊荐芳馨一盞寒泉敢先釀翩翩沙鳥沒蒼烟
紅蓼丹楓舞斜照急呼艇子汎漪漣正欲渡間狎漁釣
同行磊落三數公嘉此襟期非素料襍戔吟寫樂遊詩
愈使西湖有光耀伊余同賦却忘言了知造物工相撩

千古遊人安在哉
城郭山林歸一窖
會須象罔得玄珠
可免小兒輕侮笑

次韻洪景盧雪

時約往玉壺觀
雪因余詩罷會

瑤臺迥物表
地脈誰解縮
一朝天門開
跬步即瓊屋
靄靄行簇雲
霏霏忽眯目
初疑蛺蝶驚
故遣兒曹撲
須臾大如席
幾車飛鸞鵠
化工信巧妙
花卉千林足
潔白皎奇姿
光芒渺地軸
清垂寒江釣
靜折空岩竹
唯人在宇內
太倉一粒粟
俯仰得真賞
四坐列羣玉
錦繡張軒牖

珠翠輝華燭鉢擊筆下成杯催甕頭熟檀板觀紅綃更
磬新裁曲寧知冰氏子窮歲無半斛裹褐欲蔽膚尚待
春苗綠為瑞豈宜多覲消胡不速

聽阮

水晶宮殿黃金闕玉斧修成大圓月漆光照膽毛髮寒
依約峰巒見林樾誰人於此安四絃流水高山寄清越
初如孤鶴唳藍田漸若羣鸞舞丹穴踈踈夜雨滴秋堦
忽然雪竹空岩折世間萬態不可窮絃中有口俱能說

錦瑟華年過眼休枯桐已為伯牙絕是間真意亘千古
千古仲容名不滅人生俯仰天地內瞬息百年同一閱
請君姑置是非事來憑雲窻聽高潔

寄題勝金閣

黃金委糞壤六籍垂日星茲焉論勝負無乃未知經雲
林倚傑閣楚楚羅汗青寄與閣上人移之置中局

鄭峰真隱漫錄卷一

欽定四庫全書

鄧峰真隱漫錄卷二

宋 史浩 撰

古詩

古風四首

願真

門外長安道紛紛名利人誰知方寸許有地可願真真
能了萬象亦復冥諸塵不離虛幻境舉目見全身

雲壑

壺天眇巨壑微雲映脩林英英從何來膚寸忽千尋
早歲驟為雨春空輕作陰會須搔首聽中有老龍吟

月巖

青山吐白玉團欒光萬頃何時飛來峰著此破昏暝
料想清夜闌主人深自領安得招歡伯三人成對影

善淵

觀水須觀瀾監水必監止清漪不受觸風定畧無滓
時

以喻方寸太虛融衆理客來如問津須君親指似

送王嘉叟編修倅洪州

男兒抱經綸動必為時利姑置俗儒談盡各言爾志匹
馬從軍游叫閭上封事秦王不能坑漢祖不敢戲不溺
蠻粵頭當斷匈奴臂雍容奏凱還禮樂格天地化工泯
無迹君隆堯舜治此志倘蕭條五湖資一醉釣竿拂滄
波藜杖倚烟寺采菊秋荐馨紉蘭春及衣作詩以遣懷
把酒以適意隨處是道場其樂巨思議公乎箇中人出

處洞茲義彈冠下七閩逶迹中都吏學士如堵牆爭欲
挽之試公曰平生心科目非所覲我有活國謀囊封徹
天視九重一夜闌拊髀為歔歔遲明未報可襍被秣歸
騎帝曰予汝嘉予憂在閩寄南昌古名藩咨汝往其貳
畫棟曉飛雲珠簾暮雨墜要當軫民癘豈獨覽佳致公
清衡重輕內外匪殊異苟與道周旋俯仰何所媿金叅
以鍊剛玉美由火熾隱忍斯成功沈深乃大器窮達付
自爾是謂浩然氣宣室行受釐前席寧許避吾詞非浪

發請公默而識

送王時亨舍人帥蜀二十韻

文翁上岷江風化亟飛揚
我我當代間輩出王馬揚
挽彼石室流濯此錦繡腸
遂令蜀士夫至今能文章
武侯隱偏地雲龍適相值
純誠革斯俗三代可立致
千載凜如生老栢猶英氣
遂令蜀士夫至今抱忠義
乖崖一專城四海喧嘉名
發奸照幽伏世仰如神明
靈燬跡已去靈祠俎猶腥
遂令蜀士夫至今有能聲
清獻鎮南嶠餘

風弭貪暴琴鶴適自隨意茲雅非好熙朝慶登崇深仁
格穹燾遂令蜀士夫至今秉清操英英王紫微橫金擁
旌麾五十四州地和氣濛烟霏兼美數君子士夫得其
依行行報政成天子竚公歸

次韻姚令威郎中九日部宿

堂堂老詩匠持被入星省烏帽不衝風青綾怯餘冷豈
無菊盞杯莫洗寸心耿却呼短檠來共此良夜永

上建王生辰

辛巳

高穹祚明德聖主厯無疆談笑復境土穆穆游岩廊一
定天下本忠孝資元良願言千萬壽玉立侍清光

椒殿霽葱蒨瑞霧濛烟霏有子不必多一夔燦斑衣天
地久覆載日月長光輝願言千萬壽怡色奉庭闈

太史仰乾象光芒見前星森然拱帝所無乃趨過庭道
德粹金玉詞華渺滄溟願言千萬壽聲聞炳丹青

炎圖亘無極吾王今中興銀潢注瀾漫及是歌繩繩金
龜曜玉砌芝蘭香始升願言千萬壽頷首觀雲仍

辛巳臘月休日絕江至瓜洲觀戰地與馬德駿馮
圓中二郎中會舟回焦山德駿令孖始來侍行某
偶留金山不獲與此游輒和三詩以寄懷時駕至

鎮江

德駿瘞字韻

天地一郭郭陰陽司啟閉大江蟠其中滔滔每東詣瀾
漫萬頃寬源委衆流細經營到楊子詎可以里計頗聞
神禹功設此限地勢羣龍沸波浪風雨雜吞噬稍非濟

川手未免魚腹瘞三國取漢鼎英雄馳亂世交朋若弟
昆反眼或背戾各取天一方巢穴自株柢唯於阿堵中
快心咸底滯曹丕亦時傑弭節悖無際胡為稱干戈狂
醒倚微毳笑指鐵甕城不遑欲睥睨皇穹佐有德奪鑑
俾昏翳烟塵一時平兵威即衰替我來弔瓜洲與子若
宿契焦山空在望我實媿牽制

圓中鶴字韻

輕舸艤江許欲作揚州鶴翩然下中流隱隱片帆落兩

岸阨海口焦乃居上齟呀呬受滄溟餘地著萬壑碧瓦
差龍鱗浮圖峙麟角潮回露灘舂礪砢出堅确仆碑蒼
蘚餘琬琰在山脚玉氣薰林巒風煙不蕭索何年王右
軍大書此鑱鑿遂令衛永輩千古束高閣嗟予咫尺許
來往誠大錯賴有三公詩時時資咀嚼唯憂赤地旱茲
石或流爍用汝作霖雨王言非戲謔

德駿賢郎銘字韻

名覺

老鳳鳴阿閣有雛爍丹青相將上浮玉有翼垂南溟惟

實在竹頭香霧風冷冷惟泉似清醴漱作甘露零滿胸
飲冰雪終日翔禪局摩娑古斷碑顰額嗟天刑覓句寫
真賞豈只誇一能後生正可畏之子乃妙齡使我讀數
四爽氣生襟靈飛書寄豚天俾作座右銘

陪洪景盧左司馬德駿薛季益馮圓中三郎中
汪中嘉總幹游蔣山以三十六陂春水分韻得

三字

壬午正月十五日

大江洶澎湃風靜星斗涵截然當地險界限天東南金

陵帝王都窟宅何耽耽龍虎爭負恃盤踞昔所談我適
訪陳迹策馬衝煙嵐蔣山上疊翠秦淮俯拖藍寶公道
場主貌像堅瞿曇千年窄堵波倒影落寒潭共知勝絕
處即是彌勒龕春春足佳致慨想聊停驂六朝互興廢
較德同朝三中原文武境久困兵貪婪曾無混一志溥
施鴻恩覃區區守霸圖跼束令人慙豈若吾主聖坐遣
兇渠戡長驅翔瀚上垂拱受朝參回觀茲輿區脫去如
遺蓼小臣執羈勒喜釋心如快再拜觴萬壽愷樂將屢

酣却來尋故樓了此七不堪

次韻馮圓中雪

東風巧醞寒吹雨作飛雪酒面不成春獸炭何曾熱墮
空遠飄飄入簾輕瞥瞥功歸大有年誰道軍儲闕

餞馮圓中郎中守邛州

岷峨秀多士照乘輝連城夫君挺奇瑞梯棧來神京殿
前策三道光焰摩九精甲科雄鷺序四海馳文名一朝
坐壁水緩轡登蓬瀛二年作銓總談笑流品清陞對本

故事中間俄一鳴黼座固色喜無乃羣邪驚堂堂頗牧
論萬古追家聲胡為忽掉頭解組尋歸程帝曰邛笮民
撫字宜煩卿汝其下膏澤癰瘡均豐盈上方寶環賜遲
汝襦袴氓永平二千石倚任誰云輕况復近鄉井正晝
錦方榮過家仍上冢鉦鼓喧雙旌男兒貴行志豈俟腰
金橫風雲儻際會袞繡居槐庭別酒置客邸伊嗟未忍
傾所嗟君子外何獨傷離情

途中即事

巾車向東南御者欲西北西北信繁華豈若吾故國有
泉可洗心有舍可休僕御者契我言欣然亦轉轂

四山俱荒茅松竹不露穎清絕一株梅依依秀孤嶺輕
風引餘馨淡月露寒影東君蚤催實待此荐金鼎
春水漲波穀畫鷁爭先馳一夜風如許持此將焉之小
艤俟風息居然無險巖紛紛彼朝涉欣吾未解維

次韻潘德鄜山行

即雪竇山

學佛以佛魔學儒為儒縛胡不朝隱几嗒焉似南郭是

非風過耳名利束高閣回視平生心無乃亦大錯便當
息萬緣擺去如斧削神遊八極表笑傲有餘樂山水得
勝處一攬襟量廓杖錫羣峰顛宮殿浮碧落下瞰徐符
岩居然在山脚衆水會一澗頽波瀉珠箔奔放出中塗
隱潭鍾萬壑轟如破蟄雷急似晴空電或復地中行鳶
飛魚自躍躋攀至飛電乳竇知誰鑿向來因風絮句法
誠軟弱六花傾萬倉千古無鎖鑰濛濛潤遍寰海何止灑
林薄凭欄眼欲眩頓洗眵昏濁翻身工妙高愈覺吟魂

矍鑿齒對彌天相視兩無作祇恐星軺登蕙帳聞怨鶴
次韻潘德廊詠曇老四窻

石窻兀太虛四顧蔽雲幄朝看爽氣浮暮送紅日落主
人宅是間結茅侶猿鶴平生丘壑姿肯內謝康樂客有
子潘子登臨富佳作筆發天地秘靈光動廖廓長謠萬
峰頂世事俱脫畧回頭睨俗士機巧費穿鑿

上賜御製新秋過雨書懷詩且令屬和

畏暑却餘威颯馭臨寰海一雨濯寥空晴光露精彩乾

坤陟清涼居然神觀改俯聽林麓間萬彙喧天籟便當
置蒲葵喝者得自在此恩夷夏均聖德如天大

進錫宴澄碧殿詩

季秋中澣日淳熙隆四禩朝回攬轡間中使俄傳旨少
須日轉申宣召陪宴喜預令掃玉堂深夜備棲止悚懼
跪承命走騶亟穿市絳闕聳皇居非煙常靡靡入自東
華門熊羆森爪士詔許乘肩輿安徐無跛倚復古距選
德相望幾數里修廊接雲漢宮堯燦珠蓋中途敞金扉

恍若蓬壺裏羣山擁蒼壁四顧環弱水山既日夕佳水
亦湛無滓冰簾映綺疏瓊殿中央峙澄碧曜宸奎神龍
爭守視舞蹈上丹墀天威不遠咫奉觴祈萬壽時蒙一
啓齒餘波丐鼠腹酒行不知幾徘徊下瑤席緩步煩玉趾
從游至清激錫坐談名理泉聲韻瑟琴一洗箏笛耳皇
云萬幾暇觀書每來此論道及帝王直欲齊其軌堯舜
禹湯文前身無乃是臣言匪獻諛道實由心起既然明
是心要在力行爾登橋醕餘壘飲興未容已金蓮引雙

燭再拜離階祀玉音寵諭臣此會宜有紀歸塗感恩榮
占寫忘骭馵

次韻程泰之尚書

程王二夫子聽履上甘泉咳唾妙一世萬斛明珠圓官
居季孟間風義帝相先每當持論許聞者殆欲僊蛟龍
縱巨壑鷹隼橫寥天坐令膾炙餘枵腹猶便便程方秋
欲半金波照觥船追想昔年日高會有由緣親故持吉
語置酒家東偏今年玉堂直對此宜無眠夜色涼如水

冰輪吐層顛顧影還自慰身冠六卿聯巍巍太平基聖
主樂得賢作句紀茲夕所喜期不愆藏之在巾笥未肯
露其全王於退食際髣髴知云然求之既愈力璀璨出
長編荆潭佇唱酬凡目一洗滌我生亦何幸披味如擊
鮮明朝問紙價都下已爭傳

又依前韻

混沌既開闢溥博分淵泉其中具明眼來往類跳圓惟
有詩工夫可探造化先研摩到極致換骨如得僊上以

美教化下以明性天元白愧重濁鮑謝羞輕便佩劍雖
相笑沈迷乃同船未登風雅域為問何因緣無非警策
句各在詩一偏我欲窺其奧宴食宵不眠觀舞悟深旨
曾不及張顛清新之奇妙局束猶拘聯習氣未能斷為
之乎猶賢寫出多瑕疵未免拙惡愆公詩百篇內浩然
志帥全愈出力愈促即之俱自然熟讀已成誦寧待三
絕編如澡銀潢水塵氛俱盡湔敬當珍此賜墨蹟令常
鮮更許示餘帙泚筆吾須傳

次韻李光祖瑞香

石蹊萬折凍欲裂兩岸梅英照天發於中更有錦薰籠
芳菲不待勾萌達奇姿冉冉來僊源從此橫枝不直錢
東風零亂委泥土只為山家作玉田豈若夫君有真色
紫葩碧葉從初得幾將消息露人間紛紛塵俗誰能識
晚居盧阜聲名飛蕙帳悠悠春夢遲起來鼻觀猶馥郁
杖藜便覺香風隨天桃謾說燕脂染落絮徒云白氈糝
品題一著佳客稱併使丁香風味減藍溪夫子誠好事

贈我此花良有為平生巖壑在胸中培植根荄年不記
故應謂我知花譜十夫綵綵來吾圃拜嘉歡喜不敢當
直欲美芹羞帝所昔扈龍輿白石川回鑾小憩玉津園
曾見此花千百本較量今者端無前若居御苑逢膏澤
車載盆栽惟所適吾王顧盼即生春不費陽和些子力
恭和御製長春花詩

玉殿萬幾閒宸章燦珠蕊俯念簪履舊恩光來太紫禁
簾玩長春嫣然異羣卉固亦佳時過逐流水獨此

供清遊餘香襲芳芷一經聖品題貴名何日已再拜體
皇情感深銘諸几

帝予四時春著花無浪蕊殖本在蓬壺非烟籠翠紫雪
裏友寒梅芳辰領繁卉每蒙天一笑睿思湧泉水露丐
及老臣芬薌勝荃芷況復屢褒嘉載賡寧但已第愧狂
變辭不足溷瓊几

玉帝富雲章寶匣鑄琅玕六丁謹緘滕芝彤燕泥紫龍
銜下碧虛端為詠嘉卉咫尺不違顏何曾隔弱水炷薰

啟天藏椒蘭和白芷光焰萬丈餘光臨殊未已敬須營
傑閣敢只留斐几

恭和御製翠寒堂詩

禁蘄蔥蔥擁瑞雲雄樓傑閣環金碧花光草色媚芳辰
鳳輦春容惟所適中有虛堂玉作楹冰雪玲瓏周四壁
不知跬步是瑤臺何須八駿殷勤覓青松萬箇拱簷牙
生香不減芝蘭室更欲相看飽歲寒疎梅瘦竹為三益
吾皇土木未嘗興為詢此景從何得神運元從德壽來

天成豈假人工役

次韻楊醇中

昔年居處雖同里止識荊州面而已
竭來蝸舍細論文始向靈臺見吾子
夜闌相與哦新詩珠璣璀璨皆英辭
野塘轉月梅影瘦深院風靜簾旌垂
策杖園林窮勝事心遠尤驚塵世異
豈唯得助有江山更却紅裙愛文字
金盤磊落百果裝玉壺嘉醕浮清光
坐上風流俱鮑謝況乃有子無他腸
酒行無算不可數便欲飛身到仙府

忽然巨軸出長篇
媿我無言參也魯
笑呼適意談交情
共聽夜鶴鳴空庭
良辰美景賞心處
喜遂四者之難并
却將健句徐推拓
三歎餘音見依約
去辭榮歸故鄉
贊我紛華滋味薄
次言奎畫在蓬門
乞與龍章照眼根
茲我謝氏如獲寶
報以瓊瑤未足論
我慙輔相初無補
偶爾逢時遇真主
但能奉此翰墨珍
庶若商那因考父
林間稚子獻殷勤
只為君知愛厥親
遺羹美意見方冊
今此一舉如千鈞
君不見皇家已視金鑾草
趣君徑上

長安道忠臣須取孝子門空谷行歌駒皎皎

題蝸室

平生喜善類遇之以青目廣廈千萬間
幘幪未渠足唯予自棲身三椽乃蝸縮
問之何為然知足常不辱人生天地間
渺然如一粟侈心纔動搖曷厭溪壑欲
紙帳煖有餘蒲團眠易熟神遊萬物表
不慮此局促門外競軒冕卑哉蠻與觸

次韻曇師以某焚三代贈黃所示長句

霽天破曉嚴清霜宿具贈帛羅豆觴旌旗蔽野氣軒昂
夾岸更復飛舟航金爐細爇百和香絳籠然蠟影交光
問予何事出柴桑為指白雲山中央岩岩雙表鶴翅張
松楸靄靄摩青蒼漸登幽域至饗堂向來百物陳滿床
錦囊綸誥列前行奠酌器皿皆琳琅祝言小子心不遑
幾年卹典篋筭藏抵今方獲燔贈黃覬靈來兮染指嘗
潛德既拜天褒揚後學感激兩淚滂帝恩欲報方思量
忽睹健句如栢梁葩華盈軸艷春陽建安七子誰可當

何止李杜萬丈長再四披閱予敢忘同來親賓皆在旁
共詫粲可能文章其中一客起鳴吭衆駭何為色不康
未甘釋子侵子疆

走筆次韻寄平元衡禪老

年來管城不脫帽只羨夫君詩法好怡雲剝啄到雲寮
始知春風屬此老憶昔代匱持釣衡紅塵瘦馬太忙生
自從得請歸吾里常與鹿豕為羣行有時片月隨杖屨
飄飄洒洒欲仙去去尋杖錫四明中聽取怡雲末後句

次韻戲酬張以道

新詩韻清越宛若泗濱磬呼兒誦終篇悠揚久無定渾
欲挽斯人歲晚共三徑爛飲煙蘿間不知夕陽暝

次韻張漢卿夢庵十八詠

夢庵

茲庵路何許雲深不知處夢覺兩俱忘始可驀直去

勤齋

默豈交摩詰談何事阿戎時行百物生不息唯天工

妙用寮

空中一物無於焉生萬有向此求神通杯捲即非柳

玉沼

一泓湛無滓遶砌如天成鬚眉徹底見風浪何曾生

碧溪庵

煙嵐染秋黛潺潺逕大空平疇藉光及比屋饒千鍾

山房

平生安樂地不受利名煎其中一空洞寥寥無色天

喜老堂

生處本恬淡得失誠酸辛
婆娑鬢漸秋天地一閒人

宴默庵

法門建章富法幢空處成於此
下一則浮雲浣太清

衆香堂

穠薰知見林燕坐觀物化鼻孔如撩天
可聞不可畫

禪窟

胷中炯明月一照萬緣空
蟬蛻雲霄表墮地為儒宗

隱山巖

夫君活國手愛此隱仙字行再出刀圭可使民久視

霞外

注目眇無際彤雲燦晚暎心融八極表欲辯已忘言

駐屐

緩步一徙倚細數新條枚悠然得真趣獨立遲誰來

月林

蟾窟有奇芳殖根此茂密人間萬種香企之不可及

積翠

萬疊互圍繞風煙朝夕俱三穴已掃竟無復藏妖狐

醉宜

何人過三徑共此麴蘖春月下倩人扶花影鋪滿身

澄漪

濯纓與濯足均是滄浪水箇裏不勝清渭神爽應此

聽松

灑然清冷吹過我十八公颼颼喧宇宙可奈此孤叢

走筆次韻張以道

石窻

嘗聞皮陸句未覩心先降于今煩鬼工徙置排金釭蕙
帳擁猿鶴石磴來旌幢月明風亦靜篆煙浮四窻

過雲

雲埋路欲迷獨許幽人過時從客子來更尋深處坐抵
掌到幽眇萬事俱識破茫茫名利人糠粃不足簸

雲南

空洞遠萬里佳景萃其南
穀紋波似染螺髻花羣參紫
芝鮮最馥青櫺堅直甘解石
羨門侶雙鸞聊與驂

雲北

幽巖列仙貌陰雪如粉撲
矧當搖落時宛見沙漠北朔
風吹不動中有難凋木吾嘗
愛此景小駐葛陂竹

鹿亭

雙鹿處岩隈似有人性靈
山童自馴擾俗客必心驚
循除水瀼瀼竹暗藏幽亭
有時帶露歸泚泚身有青

樊榭

何年樊仙翁踞此作雲榭境勝唯清涼寒燠匪冬夏俯
觀塵世人杳在萬仞下漸次入真境還如倒食蔗

潺湲洞


萬派漱寒玉及此猶潺湲臨流覲毛髮體粟生輕寒餘
波蕩塵氛一洗清塵寰觀瀾得妙理用處心常閒

走筆次韻胡中方賞丹桂之什

粟莖搏金葉凝碧獨在秋林逞顏色豈知東溟史氏居

別有奇標人不識嫦娥侍女盈萬千一一姿貌皆無前
為厭此花忒淡薄渥丹乞與春爭妍媒滋燕脂霜染蒨
殖根只向廣寒殿幾塵俗韻不可干清涼唯許金風扇
何年移到蓬萊鄉鉅萬索直誰敢償盤紆欄檻久不曜
一日名飛並國香豪貴爭看期縮地載酒遲來煩鼓吹
園丁聞之競采擷夜深不使花神睡接枝換骨離四明
飄飄爽氣排妖氛遂令禁籞成真賞餘馨賸馥常氤氲
芙蓉寒菊不足數包羞正似無鹽女從渠搖落動秋聲

獨步唯茲徧寰宇我嘗對此傾葵金却思四海狀元心
殷勤勸花宜且住寒士人人折得去



鄧峰真隱漫錄卷二

欽定四庫全書

集部

鄭峰真隱漫錄卷三

四

詳校官庶吉士_臣李如筠

主事_臣呂雲棟覆勘

總校官降調編修_臣倉聖脉

校對官中書_臣孫溶

謄錄監生_臣戴祖覃

欽定四庫全書

鄧峰真隱漫錄卷三

宋 史浩 撰

律詩

贈別王虛中平江贍軍

愛子詩無敵清新日造微解顏方一笑折柳遽成歸蘇
館凝香重松江膾玉肥是中如得句無惜寄柴扉

次韻趙若拙酬酬

春去雪又在夜寒風自香娉婷白玉面縹緲碧雲裳露
下已侵袂月明初度牆婆婆光影下老子坐胡床

次韻劉國正立春

百歲今強半逢春却怕春趁時三醖酒轉眼一年入車
馬繁華地江湖漫浪身茅簷擁殘雪清夢到家頻

秋荷十韻

漲碧湖方迴嬌紅藕競芳已疑星斗下仍訝錦雲張脉
脉初離立盈盈忽綴行煙藏何限思雨送不勝香解佩

臯臨漢聞弦浦近湘向來便看此欲去未渠央葉好嗔
兒摘蓬新喚客嘗更禁和月淡直思付風狂得載平生
酒閒鳴盡日根甘將百詩詠恣弄水仙鄉

次韻恩平郡王

彤庭秋皎宴和氣與春同壽酒千鍾綠宮花萬疊紅金
羈鸞仗底赤舄玉階中歸路聞人語關雎誦國風

次韻恩平郡王游山登寺中小閣

天邊倚蕭寺小閣翠微中煙靄三峯秀松杉一徑通潮

音從耳悟塵慮轉頭空堪笑林間弋猶思落塞鴻

和建王明遠樓

天闕移樓觀來供帝子親明光扶日域遠勢接星津瑞
靄常濛濛清風每拂塵圖書惟左右脂粉却參辰覓句
多詩髓開談即道真槐陰瞻五學芸藹見三神雨露恩
方渥江山景倍新願言增萬柱寒士並棲身

送杜殿院出守遂寧

萬里徠西蜀聲華振士林匪躬無近援聖主作知音已

破姦邪膽方勞撫字心政成須趣駕天下仰為霖

次韻姚令威郎中從駕早行

姚馬真人傑英標貫伏犀脩途隨上下軟語雜高低扈
蹕俱多士揚鞭過萬蹄伊余茲濫吹所喜發醯雞

軟軟長空雪霏霏似粉犀色同無路險野濶見山低王
葆隨鸞仗銀杯逐馬蹄催班何太早夜白悞晨雞

大駕遐方國熊羆間象犀風嚴知令正雲重覺天低夾
道瞻芝表中原逐獸蹄定宣恢復赦拭目看金雞

聖主披英俊公才是擢犀班揚俱氣懾屈宋亦眉低健
鵲摩天翼真媒歷塊蹄回眸看賤子下駟與鷄雞

有美風騷將詞鋒利更犀胸吞雲夢小氣壓斗牛低鷲
鳥常舒翼名駒豈鑿蹄不能勝百戰渾欲介吾雞

曉起用前韻

破曉窮幽眺端知翫月犀雪消青嶂近天淡玉繩低出
塞三春翼嘶風萬里蹄男兒弧矢志何事飯籠雞

晨興懷寺中用前韻

薛公言慷慨端可諷馴犀器廣蜃江小名高雁嶺低宸
居清瑣闥禁路紫駟蹄揆德宜長處何因夢白雞

同遊賞心亭用前韻

古堞高千雉危亭屹巨犀雲霄知路近星斗入簷低山

繚龍盤脊江涵虎踞蹄相攜倚秋閣得失付蟲雞

老杜
蟲雞

得失無了時注

曰寒江倚秋閣

賞心多樂事快目喜聯犀雪浪翻空急江雲過眼低天
寒風著袂興盡馬旋蹄歸路仍泥滑林間語竹雞

次韻洪景盧右司問梅

東皇榮萬木首倡屬江梅得地應先發須時不受催可
堪連日冷未忍一樽開竹外搖殘雪知君到幾回

次韻皇孫所和二詩

錦繡環清蹕祥雲捧日華千官鵷鷺集萬騎虎貔誇餘
孽皇威遠中原望眼賒遙憐太液水波煖欲生花

歲晚垂弧旦雍容從北征龍舟瞻日表兔苑足詩情况
有流霞美何辭醉玉傾祝君無限壽煙閣寄功名

餞馮圓中吏部出守

蚤歲登巍第郎潛正黑頭一封憂國慮五馬便鄉州筆
底平生學平生康濟謀勝須勤蓄積聖主欲兼收

進明堂慶成詩

六閱淳熙禋秋高日仲辛大君敷渙號重屋荐明禋玉
輅興清廟龍旂亘紫宸雲陰連夜解霽色一朝新周禮
樽壘備虞韶樂舞陳合宮天地並侑席祖宗均峻城登
三獻脩楹秩百神肅祇伸睿意肸鬯降高旻宣室宜

膺福慈聞亟拱宸蓂花馳萬騎歸昨見

音現

雙親釐事超

隆古年齡肇億春蓼蕭覃有截成命播無垠惠餒頒羣
后恩波逮老臣祝堯非健筆徒學華封人

經筵讀正說終篇恭進謝恩感遇詩

淳熙八年四月二十

九日

帝祚隆三葉仁風被九垓泥金封禪後汗簡典墳新祖

訓敷皇極奎星耀紫宸儒家尊首志

臣謹按國史藝文志儒家以太宗皇

帝大明政化十卷真宗

文論歎前塵

臣恭覽御製正說後序有魏文之論

聊以同時之語昔魏文為典論二十篇文選載論文一篇聖作淵與魏文豈能彷彿道泰千齡會

時和萬物春好生兵遂偃崇儉俗還淳傳寶參河洛重

光侍聖神求講深紬繹退訪極諮詢治紹堯稽古歡諧

舜事親披編茲有獲徹卷豈辭頻錫予恩波浹榮華宴

俎陳奏詩無傑句拜手愧名臣

仁宗皇帝朝故相晏殊有讀正說徹篇賜宴詩臣謹

按殊實仁宗皇帝東宮舊臣與臣遭際事適相類

次韻孫季和東湖二詩

出郭乘清興扁舟一迅風山光真黛比水色與天同宿

鷺班班白寒楓處處紅誰知吾勝際名冠甬勾東
水拭雙鸞鏡山環六曲屏雲端迸朝日木杪見疎星梅
塢春長在柴門夜不扃援琴誰寫景思得與君聽

送安之往依沈叔晦師席

吾孫年甫冠抗志在青冥重趼輕千里求師為一經功
名適來去器識是丁寧既得賢模範歸歟喜過庭

蟻王得知字

蠢蠢稱螻蟻尊王世所知峻臺存主禮環穴受臣儀依

戰如揚武排行似出師南柯雖一夢治國得良規

蜃樓得生字

青蘋風乍息巨浸欲潮平毒霧方看吐層樓忽已成憑
欄無海若吞鳥類羅生安得揮長劍驅除致永清

蛩吟得時字

蟲唯蜻蛚類近漸實知時露重哦寒曉更深攬夜思堂
中譏晉什床下誦幽詩唧唧俱成詠何曾撚斷髭

花鬚得中字

花有千跗萼藏鬚向箇中怒張擎曉日笑翦寄春風
蚪捲香絲亂龍掀膩粉叢露尤的皪唾玉在鬢髮

柳帶得歸字

渭水亭亭柳春柔可綰衣煙添染黛色風來舞腰圍對
影同心在攀條解賜歸行人繫不住結綬上王畿

雪消得寒字

同雲收萬里愛日已三竿見曉將潛迹無風特地寒晴
簷如下雨稿澗忽鳴湍漸覺山河復方知世界寬

雨絲得秋字

千絲棼不亂細雨忽盈眸密密如機捲踈踈豈繭抽紉
裳難作縫欲釣不勝鈎霖霖知何事收功在有秋

豆粥得客字

殘臘風霜勁嘉賓嘉會逢清泉雲子滑熟未桂香濃金
谷咄嗟具蕪羹倉猝供爭如金雅宴樽酒共春容

水仙花得看字

奇姿擅水仙長向雪中看翠碧瑤簪盍鵝黃粉袂攢夜

闌香冉冉風過珮珊珊著在冰霜裏姮娥御廣寒

鍾馗圖得入字

虬鬚張怒目藍綬鞞烏巾抃舞身無定驅除夢有神收
功祛瘡鬼流詠起唐人圖畫高懸處明朝慶履新

椒盤得多字

有美椒盤獻三朝慶始和靈莖叢玉敦醞酒滿金荷不
向湯銘見其如晉頌何欲知勤祝處功在歷年多

詩社得神字

今宵文會友作句擅清新始也詩言志終焉筆有神既
無折角者寧有面牆人只待逢真主艱難七月陳

叔父知縣慶宅并章服

芝檢熒熒金縷黃拜恩初捧鵲爐香花籠麗日暉朱綬
燕啄新泥上畫梁歌遏行雲鶯睨曉舞飄回雪蝶輕狂
一卮競祝雙椿老佇看于飛到玉堂

次韻權郡錢直閣鹿鳴宴

端禮處和

去去無材策治安資風力助輕翰欲平紫氣頻侵斗

當倩中書為脫冠香入梅梢春意近德將鯨飲玉杯殘
珠璣更復傳華袞榮比青霄駕綵鸞

次韻錢直閣和呂支鹽梅花

隱隱仙姿迥出羣
竭來還是一番春
山牆倚雪凝姑射
水國臨風詠洛神
清洗嬌腮全惡粉
快飛幽馥去朝真
直交別浦停三弄
羞作高樓欲墜人

次韻汪元舉以詩覓時季和海棠花栽

一紙淋漓醉墨鮮
錦囊連夜到溪邊
搜求仙種寧辭遠

惱亂花神不使眠弄影未看妃子態補亡先得少陵篇
明年應向東風裏百遶雕欄玉步連

次韻王正之驚蟄有感言歸

聞說天家起阿香攬桃催杏臉無央夜蟾不解照仙李
朝雨何妨夢楚王知買扁舟成折柳賸哦佳句作甘棠
故園風物雖云好何必歸程遽許忙

次韻范經幹昆季昌國雜詠

酴醿花

滿架猶煩雪作英年年嚮此眼偏明春遲故欲牡丹伴
韻勝還馳雅客名縹緲碧裳留夜月娉婷玉面起朝酲
却嫌梅蕊無才思零落蒼苔為笛聲

江倅出家樂

沈沈春酌話綢繆花月行船看拍浮手束柔荑調雁柱
袖翻紋錦出香毬未攀青子猶如豆欲膾頰鱗始上鉤
蓬島古來無覓處我曹今此得真游

范幹招兄顯道

片帆落處是三山絕景塵居了不關夢草池塘如有得
對床風雨亦非艱騎鯨渡海風生腋揮麈談玄笑滿顏
從此清名追二陸錦囊賡和不容閒

雜興

人言銓選異堂除我笑茲言亦太迂四海九州均一治
六曹三省豈殊途春風到處林無槁夏雨通時物盡濡
會得只將忠實報門生恩府漫稱呼

世間諛佞枉求多忠實由來曷可磨謀寢兩淮須仗汲

亂消六館獨由何當年烏府心無撓今日鸞臺道不頗
若也隨時效諛佞豈能功業許魏哉

人材莫謂世全無用則賢良棄則愚孔聖既生顏閔在
周家纔起甫申俱歸恩報德還忠實附熱趨炎屬佞諛
散盡田文門下客獨餘馮子是名儒

世間無處是堅牢富貴功名亦謾勞一景一盈天外月
再生再汐海中潮紅塵袞袞知何補白髮駸駸誰得饒
加我數年專讀易定須輕舉到煙霄

送商築叟赴南省

少微熒熒瑞光開壯士昂頭出草萊
健筆佇傾三峽水晴空爭聽一聲雷
恩承淡墨金門啟宴錫奇花玉女栽
預想春風掉歸鞅西郊翠靄上衣來

次韻商築叟雪

風威雲勢兩徘徊故遣瑤花撲面來
兔苑芳菲談笑得玉京門闕等閒開
光浮編簡渾疑月香入杯觴始認梅
為報寒鄉幾冰室功成却擬放春回

上平江守徐侍郎生日

琛獻之

翼軫騰光萬代尊
地靈人傑萃侯門
紫芝秀宇塵無染
黃憲澄波撓不渾
泥濕丹書雙彩鳳
香凝畫戟兩朱輪
生朝有客成飄泊
猶寄巢蓮碧玉樽

時節文章與盛衰
我公端合振中微
玉鋒修滿姮娥月
天巧分殘織女機
正始風流回治世
豫章宗派得傳衣
知音久矣煩牙頰
一瓣爐熏心所歸

上紹興守俞閣學生日

正月一日侯居易

扶輿光氣擁清苕竦記真儒載誕朝天令聿新青帝律
王正初御紫宸朝已開師幕居東陝行握台符侍九霄
春醕如澠介眉壽亦應無喜頌陳椒

試向黃堂壽我公龐眉覩齒氣冲融烏飛會看三松老
鯨飲何辭百榼空的皦方瞳曜遲日扶疎綠鬢受春風
摩挲銅狄長安道肉眼它年記此翁

自從戟鉞臨東閭戀戀車塵拜紫芝排霧已逢回阮眼
持螯誰解測黃陂知音不借一人譽走驛聊馳千歲詩

桃李從今滿天下月明烏鵲得依枝

次韻高宰謝朱倅惠酒

仙廬深倚翠微間酬答風煙肯暫閒
不遣長須干美政却馳霍槩破愁顏
句高飯顆人應瘦醉著河陽鬢未班
楚客秋情正無賴併須乞取展眉山

上曹守徽猷生日

泳景游

東皇縹仗下層雲來駕和風再浹辰
勲闕此時生鸞鷟天家滿意抱麒麟
方瞳的皪輝遲日綠鬢扶疎受早春

太史談公甚奇異老人星即是前身

天聖陰功天下母慶源重此毓英髦政區賢否澄冰鑑
詩得江山妙綠毫已使列城歌既醉可無衆口賦崧高
油幢誰道容溫席行從君王宴碧桃

上高提舉生日

淡蕩春光二月餘鬱葱佳氣靄扶輿杏園高萼紅千顆
銀漢新蟾玉一梳控鶴暫辭仙府籍觀風聊擁使星車
香縈畫戟簪裾盍嬴得長生幾卷書

聖主龍飛念故人侯門雨露一番新
登瀛已寵皇華貴被綵專榮白髮親
好語舊聞千歲鶴仁風今扇七州春
定知福壽無邊際坐看雲來舞繡茵

擬進講筵尚書終篇錫宴詩

煌煌典誥炳丹青聖主于今集成已
究商周真灝噩固知堯禹本聰明
神馳帝樂翔雲海恩逐天香到酒觥
下拜龍威瞻咫尺羣臣始覺倍光生

蚤朝論道沃宸聰更許經生侍九重
萬卷精微歸一覽

小儒糟粕受三冬明兼舜目超唐漢宴錫需雲法祖宗
愧乏涓塵裨海嶽今辰亦得奉春容

寄題蔣學正三徑庵

浮名兩角競蝸牛舉世誰人肯罷休鼻祖獨能輕漢魏
耳孫寧不慕羊求似聞竹外三家市猶占溪頭十里秋
安得枯藤破煙暝細尋佳處賦清幽

紛紛俗子信么麼過眼何須問唯阿三徑固知皆坦路
一庵聊復障頽波陶潛彭澤思松菊賀老鑑湖吟芰荷

聞說與君同得道月明風靜每相過

鄖峰真隱漫錄卷三

欽定四庫全書

鄧峰真隱漫錄卷四

宋史浩撰

絕句

次韻陳春卿眇雲軒

脩竹叢中屋半楹坐來天際數峯青
定知俗物不掛眼只許飛雲過短櫺

油然膚寸起巖巒縈抱山腰玉帶寬
會作旱天三日雨

莫將空濶等閒看

下水庵曉望偶題

疎樹梢頭露曉星
薄寒侵榻睡初醒
沙鷗何處驚飛起
點破遙山一抹青

次韻范幹聞畫眉鳥聲

春風著意舞長楊
中有珍禽口尚黃
曾聞章臺看眉嫵
故應學得漢家粧

題左舉善郊居四絕

草堂

莫隨朝叩合休休萬里今誰沒白鷗付與幽人幾椽屋
不須吳詠憶扁舟

聽松

不吟柳綠與桃紅久要論交十八公想得堦前月如翦
獨將雙耳立西風

浮香

橫枝靚立碧山傍噴得幽香度短牆更欲移筇約和靖

小風吹月咏滄浪

總相宜堂

自倚傾城綽約娘不爭時世作新粧
若將西子相唐突正恐蓮花似六郎

題處州錄參廳平遠樓

山川著意吐幽奇穠淡風煙總令姿
大似鵝谿垂數幅飽看摩詰畫中詩

次韻恩平郡王晚步

步履蘅臯取次游日華清淡雨雲浮天公不喜燒銀燭
乞與歸途玉一鈎

次韻館中秋香

庭前高下碧玉樹秋日奈茲風露何兩度開花君莫問
為渠天近得香多

亭亭萬葉翦青羅豈為冰霜便改柯滿著珠璣間金粟
倩誰纖手剖天鵝

分題得花露雙字韻

凝紅濕翠媚春江殘月幽香度曉窗正恐枝頭珠作顆
冷驚宿蝶去雙雙

題雪竇隨鳧岩

紛紛飛雪墮青天窮徹隨鳧信有源想得王喬之帝所
每來巖下滌潺湲

因見父老云東湖九百九十頃七十二谿故有
是作

東湖九百九十頃七十二谿攢翠波乞我扁舟任飄泊

却敲明月叫漁歌

次韻馮圓中木犀六言

碧玉闌粧金粟香隨煙霧橫斜更欲移筇問訊前山幾
度雲遮

和建王春晚園中賞翫

靜院朝回靜鼓琴浴沂新詠間清音燕閒未省忘稽古
始信賢王寶寸陰

題嚴陵釣臺

功名於道九牛毛無怪先生抵死逃漠漠桐江千古後
雲臺何似釣臺高

題雪竇飛雪亭

蒼岷萬仞起巖巒懸瀑霏霏六月寒波及下方俱潤澤
人間須作六花看

題雪竇妙峯亭

松篁一徑曲通橋直上危亭十里遙但覺羣生俱頽首
不知身已在雲霄

丁酉八月十三日夜以經筵官番宿翰苑予十
五年前曾為學士

玉堂夜直看蠅頭燭盡雙蓮興未休簷外忽驚涼月在
正移花影到銀鈎

憶昔初為鰲禁游油拳草制拜公侯沈思十五年前事
壯志消磨雪滿頭

青煙漠漠已潛收但見銀潢雙派流白玉一輪尤皎潔
始知後夜是中秋

野庵分題

和鎮國聞笛

錢字

碧溪浮月練光寒一曲風傳到枕前應在南樓儘深處
玉梅飛墜學榆錢

苔錢

香字

誰將翠靨出青箱散在瑤堦作孔方好是樓頭三弄後
田田買斷落梅香

草茵

香字

眼眩初疑綠錦張風回猶帶襪塵香連堤費盡天孫巧
乞與行人卧夕陽

野望

低谿字

閒雲黯淡草萋萋楚澤風高雁陣低擬倩王維畫平遠
正須六幅翦鵝谿

荊指

歸字

春來初見着斑衣一束纖纖玉未肥試捧銀笙按工尺
聽君一曲阮郎歸

羞

端字

隱隱雙娥翠黛攢半遮團扇下雲端背人不語為何事
嬌怯應嫌衆目看

筆架

無字

四友文房相與俱管城偏是一豪儒自從乞得珊瑚枕
還有周公夢也無

柳陰

人字

始驚嫵媚作眉顰又見青蔥鎖暮春幾度夕陽穿小院

密藏多少賣花人

墨香

功字

萬突長然古澗松
遠煙收拾藉良工
膠媒釀出真消息
付與毛錐立儔功

茶香

功字 此詩今上
皇帝親書賜丞相

靈芽雨後發幽叢
賸馥先令鼻觀通
戰退睡魔三百萬
槍旗果解立奇功

柳色

今字

何處朱門窈窕深蕭然一徑綠成陰
回眸却笑陽關道
匹馬區區走到今

梅

真字

清洗嬌腮全惡粉暗飛幽馥去朝真
直教別浦停三弄
羞作高樓欲墜人

香霧

唐字

裊裊龍涎百和芳須臾輕謁徧蘭堂
捧爐仙子雲鬟濕
不學公超妖幻方

次韻張漢卿

釣竿方欲展絲綸獨向山房訪可人但覺煙霞隨步武
不知身已在三神

又次韻漢卿

本是飄然不繫船邇來清興為梅牽小春枝上含珠顆
蠟屐還須破晚煙

利鎖名韉此幻身故園一別五經春而今乞得歸來後
夜鶴朝猿不怨人

次韻漢卿謾賦

夫君宵次炯冰壺坐受滄溟萬壑輸付與筆端為雨露
九天神物夜驚呼

詠閒

幽蹊親見花苞拆靜室頻看香篆移莫道閒中無事業
此般消息有誰知

還鄉後十月作

後園三徑欲重開一曲新從君賜來有愧萊公勲業盛

平生無地起樓臺

乞得閒身正首丘
朝猿夜鶴怨皆休
靜觀心地渾無事
祇有君王恩未酬

鐘鼓園林無盡樂
交游息絕到春閑
予今方寸無偏係
似處陶裴季孟間

次韻鄭郎中作四明謝遺塵九題走筆不工

石牕

峻極生從地勢坤
擎天一柱四牕存
有時空洞來龍駕

列嶽靈祇盡駿奔

過雲

蒼蒼廿里籍仙蹤
出岫無心瑞靄濃
南北往來蹊徑熟
故應環珮日相從

雲南

向陽一麓與天齊
雞犬遙聞只隔溪
俗客未應容易到
是間唯許羽人棲

雲北

雲北人言是北溟脩鱗可駕上金庭高風已得扶搖便
聊向虛牕聚德星

鹿亭

誰將此物命危亭漏洩知因甫里生渴飲雲漿飢沆瀣
笑渠凡質食蒿萍

樊榭

從來此地隔凡塵多是羸秦避世人簷外飽聞丹鳳味
堦前更看舞麒麟

潺湲洞

金作欄干玉作塘
蓮漪一派注仙鄉
涓涓波及人間世
雪竇山前白練長

青櫺子

羽幘新從帝所回
餘歡未盡玳筵開
醉拋青子香泥上
留與王家取次栽

鞠侯

烏鞠攀緣日往還
人間仰視在天端
如今蕙帳休驚

曉林下衰翁已挂冠

又一絕

能比桃源去路迷洞天乞得在湖西南雷九詠增光甚
多謝雄篇再品題

用文叔州字韻和颶風詩

西帝風行殺氣秋丘陵草木盡虔劉要令地軸平如掌
混一車書四百州

和九日賜宴瓊林苑

自此用王荊公
韻計十三首

鳴蹕登高秋暮天西郊輦路直如絃禁園花覆千官醉
愈覺君恩湛湛然

和竹裏

霜筠萬箇遶雲根中作茅簷據水村疎處只容猿鶴過
了無俗客敢登門

和夜直

金蓮雙燭漸燒殘青瑣瓏月影寒五色絲綸朝入奏
天街花露已闌干

和楊柳

綠衣濯濯紅粧靚春半園林露未晞正似佳人與才子
倚窗深處淡相宜

和鍾山晚步

幽谿細雨落輕花無限春鋤立岸沙苦竹黃蘆迷望眼
孤煙起處是人家

和道傍大松人取以為明

天矯龍鱗衆欲攀肯隨蒿艾老空山便教不受棟梁用

猶作光明滿世間

和同熊伯通自定林過悟真

欲尋雲屋煮新茶
領客行尋一徑斜
遐想當時掛紗帽
笑看盤面白浮花

和城北

春溫初褪鶴綾袍
已覺東風綻小桃
檣策城陰無限景
秦淮波濶蔣山高

和答東流頓令罷官阻風

解印今朝去有期何須更勒北山移了知風伯懇留意
正是攀轅卧轍時

和斜徑

風拂繁陰開曲徑雲移寸碧出遙岑柳枝濯濯嫌煙淡
荷葉田田怯水深

和雨晴

不管狂風橫雨催小園日日有花開羣仙恐濕凌波襪
戲蹴香紅襯綠苔

和烏石

梅花一徑萬重山
岡外浮雲去住間
莫恨尋幽無侶伴
世途能有幾人閒

和烏塘

雲遶青山水遶隄
遊人陌上手同攜
遺簪墜珥歡方洽
只恐樓頭日欲西

和奉和嚴公軍城早秋

用杜工部韻二首

金飈獵獵受降旌
虎帳纍纍細柳營
坐屈遐荒三百萬

何須掠地與屠城

和從韋明府覓綿竹

縣以竹名佳致在令君節與竹俱高何妨乞取千竿翠
月影翻風似碧濤

和杜中書九日

下同共六首

佳人通夕賞重陽醉盡樓邊白玉缸莫遣飛霜到叢菊
恐驚宿蝶去雙雙

和春晚題韋家亭子

馬蹄輕蹙落花香三月芳菲墮渺茫正好留春開雅宴
危亭繡幕已高張

和朱坡絕句

芳華三月只些兒生怕春林鳥喚歸寄與東君須久住
勿容一片落花飛

和重送國基王逢

前身應是奕秋徒自謂人間敵手無君去尚留邊角勢
為君題作爛柯圖

和題水口草市

飯裹綠荷朝超市香浮青甕晚登樓憑誰寫入鵝溪絹
一簇人煙古渡頭

和泊秦淮

一葉輕舸倚岸沙沙邊燈火幾人家夜來江闊天無際
唯見銀蟾輓浪花

卽席賦木芙蓉

盈盈佇立傲秋霜露染臙脂作靚粧正似瑤池見金母

醉歸未脫綠雲裳

彌堅小圃小春見梅

孤根十月已先溫不待青春入燒痕冷艷一枝何處看
竹邊池閣水邊村

棠陰得明字

蔽芾甘棠遶訟庭日高碎影更縱橫直教憩處無人迹
始信康公教化明

硯紋得明字


歛水端溪各擅名
刷絲鸚鵡眼分明
不因守黑談玄輩
奇璞緣何見管城

阿育王山有松萬株
乞亭名於真隱居士榜曰
松風陸務觀作詩因次韻

颼颼萬峰頂
宇宙盡聞聲
會得真消息
知予是強名

瓜州渡頭六言

竹葉舟中漁父
瓜州渡口人家
占得煙波活計
全勝富貴生涯



鄭峰真隱漫錄卷四